

《中國地方藝文薈萃》編輯委員會 編

學苑出版社

中國地方藝文薈萃

湖南卷·第二輯

西南卷·第二輯
捌

中國地方藝文薈萃

《中國地方藝文薈萃》編委會 編

第八册目錄

播雅二十四卷(二)

.....

播雅二十四卷（二）

贵州师范学院内部使用

播雅二十四卷（二）

（清）鄭珍編

據清宣統三年（一九一）貴陽文通書局鉛印本影印

播雅卷第十一

遵義鄭 珍子尹編輯

遵義唐樹義子方校訂

鄭獻虞先生瑄七首

先生字獻虞遵義人珍祖崇峯府君之從祖伯父乾隆戊午舉人已未進士官黃平州學正終先生讀書目數行下而不任質家少藏書每借得秘籍即數日黏稿書案往復熟記還之以故遇物能名登高能賦當時同輩殆無其比早捷南宮以親老就博士俸在黃平八年開門教授

甲子丁卯鄉闈及門售六七人王偉士孟侯富且連捷州之科目於斯爲盛矣親沒不復出居湖洋水上所學益深胸次瀟灑而規行矩步持守甚堅家故貧在官亦不作贏計優遊疏糲以終後裔今微悉業末藝廿年前於其家神櫥中見所著湖洋詩文集寫稿盡黴濕粉朽著手不得愾息置之賴先大父手跡一裹先君東徙時捆負與俱迨珍少具知識一一檢視乃得先生詩數首且又藉以見瀝膽軼事非其精神皆有不可磨滅者在耶惜此外更無隻字存也

攜家遊飛雲巖遂宿月潭寺二首

舊聞飛雲勝始踏秀溪路何時一片雲墮在溪上樹年
深不改白遂有仙佛住濯手明月潭散我洞天步仰聽
酣笙鐘俯視灑瀑布坐疑風吹雲倏忽散爲雨茲巖信
奇絕吾遊亦特趣居然似樊劉相攜上雲去笑謝塵中
人知余在何處

朝從月潭遊暮卽潭上宿我本有髮僧周妻與何肉世
情強分別究未辨誰俗隔林聞夜禪清梵響巖谷明月
上東坡忽已映潭淥手取潭中水煮茗復烹粥癡童喚
不醒吹火婦當僕自有茲巖來幾似此遊躅擬從雲中

君借我一茅屋擺落廣文氎夜夜臥雲足

書瀝膽遺事後

有客示我瀝膽記云是陳公之所識古來忠義知幾何
罕似將軍如此事桂王在緬閱三年一杯呪水慘泣天
皇帝一名何所恃當時託望在諸藩將軍拚命穿虎穴
楚蜀滇黔厲羣傑誰知荷擔與神舟中有孤臣一斗血
一朝昆海黑漫漫牛皮坡是舊崖山從此橋頭隨賣卜
不教名姓落人閒陳公本是逃名者筆挾酸風淒古瓦
人心天命有攸歸獨念忠忱淚如瀉

附陳啓相撰瀝膽遺事嗚呼終日不見一好人不聞

一好事空過一生殊爲恨事詎知好人好話世自不
無適不我值耳今年九月望兀坐無聊有客見顧登
樓語次忽及滇事始末愕然有閒旋出而觀所謂瀝
膽公案因相抱哭切齒吳逆恨不手寸磔之天道恢
恢豈不大哉迄於今吳逆以反覆之故伏誅散骨先
帝之目庶幾瞑乎悲夫客姓黎名維祚字名遠江津
人幼不肖竟學惟雜技卜筮形家等是耽遭亂轉徙
家遵義己亥會駕狩緬時諸爵鎮將多擁兵拒守維
祚憤惋號泣徧走告以大義皆忻幸密草迎鑾奏付
達維祚乃合若干本竅木楮三尺許藏其中用荷葆

鎗等物挾術以行時庚子正月廿二日也余時寓雞足維祚過訪道其行故心壯而難之一宿去自是無從問蹤跡矣至辛丑九月十八日抵孟良府謁晉藩李定國述其艱苦及諸勛志晉藩色動維祚就破棹出諸奏相示晉藩大義之十月六日給以令諭一道中云今皇上入緬勢已危急若能走通消息茂建奇功決不負若當卽爲若轉奏時駕在阿瓦城城左右夾河洪波浩渺相拒五六日程止聲息通主臣不得見隨奉勅云皇帝密勅瀝膽將軍黎維祚據晉藩奏爾忠肝貫日義膽渾身穿虎豹趨辰極烈風勁草殊

軫朕懷茲授爾瀝膽將軍督理滇黔楚蜀勵諸軍將
士山林隱逸等謹慎固防枕戈以俟候晉鞏兩藩舉
師四路策應旦夕是圖勿遲勿怠十月十五日拜受
訖竝收空旨百道印三顆造複底小舟密藏之木刊
諸神像擊小鈺鑼肩唱以行晉藩大喜以旌甲擁至
通界始改裝返報諸營冬十一月復入緬復命比至
騰越而緬夷已送駕出矣時益孟良夷謀亂事洩晉
藩怒屠之量不可居乃馳約鞏藩白文選共攻阿瓦
阿瓦木城三重已破其三夷曰汝不過欲見乃皇帝
耳幾年和好一朝背棄何益姑止攻三日當送出否

則我亦有變計一任汝爲不得已從之閱二日右河船密如木葉內外夾攻兩藩覆沒幾盡自是兩藩分散晉徙他夷所鞏謀恢復據騰越馬寶與鞏素善詣白營遙呼曰我隻身來說好話者諸軍勿動遂入相見告以密謀言吳願與白合白遂受所給有艾將軍者滿洲人亦歡躍附從相與鑽刀歃血會上由別道亦爲緬夷送出居草殿三間白兵環其外吳兵又環之維祚至艾導入見上見維祚大哭維祚泣曰事已至此今臣惟疾奔告諸營整兵於要道刼駕上曰兒子爾可致意十王家等若能救我出我止願修行去

哽咽不能言手剪御衣一片密寫勅付卽行晝夜兼
程抵荆侯營謀於偏橋劫駕復入滇偵探駕已崩於
壬寅三月矣維祚佯狂遁去不知所終贊曰匹夫慕
義無窮乃其名卒湮沒不見不克見稱於世者可勝
道哉覽維祚事其信矣乎維祚自己亥訖壬寅四年
閒身無一日得見家足無一日不在路前後三度歷
絕域無人之境其生死固足道耶志雖不克竟亦足
悲矣

宿瑒翁叔父河梁宅

望舍愁風雨瀟瀟暮色初難尋臣叔馬遂宿阮公廬屋

小牀鄰竈窗開燈照蔬湖洋聽夜瀑清響落階除

按瑒翁府君居郡西六十里河梁當湖洋水上

與門直曰水流巖懸瀑可四十丈獻虞先生居

瀑上流去河梁四里許

題瑒翁叔父新得前輩下太和先生手跡册子示

從弟菘

珍謹注曾祖諱菘字雪容
瑒翁府君長子遵義處上

此公眞孝子千古廣文碑吾叔收遺墨其人宛在斯品
如慙下孺書不貴義之指與惠連道毋徒點墨爲

按太和先生名運昌明諸生先世出晉卞壺屢

遷居四川江津太和避甲申亂始家仁懷之生

界子貞孫慶藻皆舉人蒼潤庶常其元孫也桐梓學博成都向廷廢撰墓誌畧云少以仲閔聞三黨與妻陳氏自壯至老歲由生界至江津掃墓悲號數日哀動邨墟及衰遣子代往必號泣送之餐素俟其還每忌日素服祭奠涕泗失聲如初持桐竹時平生抱恨滄桑林泉寄傲值滇氛或勸以可出拒之曰吾不能持長劍斬修蛇封豕顧不若舞馬弄猴乎年七十六卒

偶作三言詩瑑翁叔父命爲雪客弟書之

腹善餒飽以鉏心善馳束以書之二者不偏廢廢其一

一亦敗不耕田必求人所讀書爲人芸不學古必私己
所耕田非己有叶思之思理無疑士希賢不在茲

懃贊

心堅以赤枝錯以直幹潔於拭葉自衛以棘吾師乎

謹按高祖諱之瓘字瑜翁布衣頤道喜藏好迹
獻虞先生此書珍兒時及見之端嚴猶可想也

唐同知惟克七首

惟克字岫山介石先生孫乾隆辛酉舉人選授
安徽虹縣知縣累陞湖北武昌府同知告歸岫
山爲人和而介仁而廉明初揀發福建鹽場使